



Broj: 01-57/18
Vareš, 28.03. 2018. godine

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09), člana 22. i člana 65. Statuta Općine Vareš – prečišćeni tekst, broj: 01-162/12 od 11.09.2012. godine Općinsko vijeće Vareš, na 16. sjednici održanoj 28.03. 2018. godine, d o n o s i

ODLUKU
o raspisivanju izbora za članove Savjeta mjesne zajednice Kokošćići

Član 1.

Raspisuju se izbori za članove Savjeta mjesne zajednice Kokošćići.

Član 2.

Izbori će se održati 07.04.2018. godine (subota) sa početkom u 18,00 sati.

Ukoliko se izbori ne provedu u vremenu utvrđenom u stavu 1. ovog člana, Služba za opću upravu društvene djelatnosti i boračko-invalidsku zaštitu će sa aktuelnim predsjednikom MZ Kokošćići utvrditi novi datum za provođenje izbora.

Član 3.

Broj članova Savjeta mjesne zajednice Kokošćići utvrđen je Statutom Mjesne zajednice Kokošćići, s tim da ne može biti manji od 3 ni veći od 9, a određuje se ovisno o broju stanovnika.

Sastav članova Savjeta će odražavati srazmjernu zastupljenost mjesnih područja, nacionalnu zastupljenost kao i jednakopravnu zastupljenost spolova.

Član 4.

Članovi Savjeta mjesne zajednice Kokošćići i predsjednik biraju se po postupku i na način utvrđen Statutom Mjesne zajednice Kokošćići i u skladu sa Statutom Općine Vareš.

Član 5.

Zadužuje se Služba za opću upravu, društvene djelatnosti i boračko-invalidsku zaštitu Općine Vareš da sa aktuelnim predsjednikom MZ Kokošćići provede izbore za članove Savjeta mjesne zajednice Kokošćići.

Član 6.

Obavezuje se aktuelni predsjednik Mjesne zajednice Kokošćići da zapisnik sa zбора građana o provedenim izborima, dostavi Službi za opću upravu, društvene djelatnosti i boračko-invalidsku zaštitu Općine Vareš u roku od osam dana od dana održavanja izbora.

Služba za opću upravu, društvene djelatnosti i boračko-invalidsku zaštitu Općine Vareš je dužna na osnovu zapisnika iz stava 1. ovog člana pripremiti akte za potvrđivanje rezultata izbora za članove Savjeta MZ Kokošćići.

Član 7.

Odluka stupa na snagu osmog dana od dana objavljivanja na oglasnoj tabli Općine Vareš.

**ZAMJENIK
PREDSJEDAVAJUĆEG
OPĆINSKOG VIJEĆA**

Nikola Šimić

Odluka objavljena na oglasnoj tabli Općine Vareš dana 29.03. 2018. godine.

OPĆINSKI NAČELNIK

Zdravko Marošević

O b r a z l o ž e n j e

Odluke o raspisivanju izbora za članove Savjeta mjesne zajednice Kokošćići

1. Pravni osnov

Pravni osnov za donošenje ove Odluke sadržan je u članu 13. Zakona o principima lokalne samouprave FBiH (Službene novine FBiH, broj: 49/06 i 51/09), članu 22. i članu 65. Statuta Općine Vareš – prečišćeni tekst, broj: 01-162/12 od 11.09.2012. godine.

U članu 65. stav 1. Statuta Općine Vareš – prečišćeni tekst, broj: 01-162/12 od 11.09.2012. godine, stoji: „Izbori za članove savjeta mjesne zajednice održavaju se u terminu utvrđenom odlukom Općinskog vijeća, a u pravilu istovremeno u svim mjesnim zajednicama“.

2. Razlog za donošenje

Općinski načelnik je dana 16.01.2018. godine zaprimio Zahtjev nezadovoljnih građana MZ Kokošćići za smjenu aktuelnog predsjednika i Savjeta MZ Kokošćići sa peticijom potpisima građana koji žele smjenu aktuelnih organa MZ Kokošćići.

S obzirom da je peticiju potpisalo 124 građanina, Općinski načelnik je dana 01.02.2018. godine uputio dopis predsjedniku MZ Kokošćići kojim je zatraženo od predsjednika da sazove zbor građana na kojem će se građani upoznati sa Zahtjevom i peticijom uz obavezno da se zapisnik i odluke sa zбора dostave nadležnoj općinskoj Službi na daljnje postupanje. Postupajući po dopisu Općinskog načelnika, aktuelni predsjednik je zakazao zbor građana za 24.02.2018. godine.

Dana 05.03.2018. godine, Općinski načelnik je zaprimio Zapisnik sa zбора građana MZ Kokošćići održanog 24.02.2018. godine.

Na navedenom zboru, građani su upoznati sa Zahtjevom i peticijom i ista je prihvaćena kao „inicijativa za opoziv Savjeta MZ Kokošćići“, nakon čega su građani izglasali opoziv Savjetu i predsjedniku MZ Kokošćići.

Kako bi MZ nesmetano funkcionisala neophodno je provesti izbore i izabrati novi Savjet i predsjednika.

3. Finansijska sredstva

Za sprovođenje ove Odluke nisu potrebna finansijska sredstva.

PREDLAGAČ:
OPĆINSKI NAČELNIK

Zdravko Marošević